

欽定舊唐書

卷八十九之九十七

欽定四庫全書

卷一百一十五

舊唐書卷八十九

後晉司空同中書門下平章事劉昫撰

列傳第三十九

狄仁傑

族曾孫兼謨

王方慶

姚瑋

弟班

狄仁傑字懷英并州太原人也祖孝緒貞觀中尚書左丞父知遜夔州長史仁傑兒童時門人有被害者縣吏就詰之衆皆接對唯仁傑堅坐讀書吏責之仁傑曰黃卷之中聖賢備在猶不能接對何暇偶俗吏而見責耶後以明經舉授汴州判佐時工部尚書閻立本爲河南道黜陟使仁傑爲吏人誣告立本見而謝曰仲尼云觀過知仁矣足下可謂海曲之明珠東南之遺寶薦授并州都督府法曹其親在河陽別業仁傑赴并州登太行山南望見白雲孤飛謂左右曰吾親所居在此雲下瞻望佇立久之雲移乃行仁傑孝友絕人在并州有同府法曹鄭崇質母老且病當充使絕域仁傑謂曰太夫人有危疾而公遠使豈可貽親萬里之憂乃詣長史蘭仁基請代崇質而行時仁基與司馬李孝廉不協因謂曰吾等豈獨無愧耶相是相待如初仁傑儀鳳中爲大理丞周歲斷滯獄一萬七千人無冤訴者時武衛大將軍權善才坐誤斫昭陵柏樹仁傑奏罪當免職高宗令卽誅之仁傑又奏罪不當死帝作色曰善才斫陵上樹是使我不

孝必須殺之左右驪仁傑令出仁傑曰臣聞逆龍鱗忤人主自古以爲難臣愚以爲不然居桀紂時則雖堯舜時則易臣今幸逢堯舜不懼比干之誅昔漢文時有盜高廟玉環張釋之廷諍罪止弃市魏文將徙其人幸毗引裾而諫亦見納用且明主可以理奪忠臣不可以威懼今陛下不納臣言瞋目之後羞見釋之幸毗於地下陛下作法懸之象魏徒流死罪俱有等差豈有犯非極刑卽令賜死法旣無常則萬姓何所措其手足陛下必欲變法請從今日爲始古人云假使盜長陵一抔土陛下何以加之今陛下以昭陵一株柏殺一將軍千載之後謂陛下爲何主此臣所以不敢奉制殺善才陷陛下於不道帝意稍解善才因而免死居數日授仁傑侍御史時司農卿韋機兼領將作少府二司高宗以恭陵玄宮狹小不容送終之具遣機續成其功機於塋之左右爲便房四所又造宿羽高山上陽等宮莫不壯麗仁傑奏其太過機竟坐免官左司郎中王本立恃寵用事朝廷懼仁傑奏之請付法寺高宗特原之仁傑奏曰國家雖乏英才豈少本立之類陛下何惜罪人而虧王法必欲曲赦本立請弃臣於無人之境爲忠貞將來之誠本立竟得罪繇是朝廷肅然尋加朝散大夫累遷度支郎中高宗將幸汾陽宮以仁傑爲知頓使并州長史李冲玄以道出妬女祠俗云盛服過者必致風雷之災乃發數萬人別開御道仁傑曰天子之行千乘萬騎風伯清塵雨師灑道何妬女之害耶遽令罷之高宗聞之歎曰真大丈夫也俄轉靈州刺史撫和戎夏

人得歡心郡人勒碑頌德御史郭翰巡察隴右所至多所按劾及入靈州境內耆老歌刺史德美者盈路翰既授館召州吏謂之曰入其境其政可知也願成使君之美無爲久留州人方散翰薦名於朝徵爲冬官侍郎充江南巡撫使吳楚之俗多淫祠仁傑奏毀一千七百所唯留夏禹吳太伯季札伍員四祠轉文昌右丞出爲豫州刺史時越王貞稱兵汝南事敗緣坐者六七伯人籍沒者五千口司刑使逼促行刑仁傑哀其誑誤緩其獄密表奏曰臣欲顯奏似爲逆人申理知而不言恐乖陛下存恤之旨表成復毀意不能定此輩咸非本心伏望哀其誑誤特勅原之配流豐州豫囚次於靈州父老迎而勞之曰我狄使君活汝輩耶相携哭於碑下齋三日而後行豫囚至流所復相與立碑頌狄君之德初越王之亂宰相張光輔率師討平之將士恃功多所求取仁傑不之應光輔怒曰州將輕元帥耶仁傑曰亂河南者一越王貞耳今一貞死而萬貞生光輔質其辭仁傑曰明公董戎三十萬平一亂臣不戢兵鋒縱其暴橫無罪之人肝腦塗地此非萬貞何耶且兇威脅從勢難自固及天兵暫臨乘城歸順者萬計繩墜四面成蹊公奈何縱邀功之人殺歸降之衆但恐冤聲騰沸上徹于天如得尙方斬馬劍加於君頸雖死如歸光輔不能詰心甚銜之還都奏仁傑不遜左授復州刺史入爲洛州司馬天授二年九月丁酉轉地官侍郎判尙書同鳳閣鸞臺平章事則天謂曰卿在汝南時甚有善政欲知譖卿者乎仁傑謝曰陛下以臣爲過臣當改之陸

下明臣無過臣之幸也臣不知譖者並爲善友臣請不知則天深加歎異未幾爲來俊臣誣搆下獄時一問卽承者例得減死來俊臣逼脅仁傑令一問承反仁傑歎曰大周革命萬物唯新唐朝舊臣甘從誅戮反是實俊臣乃少寬之判官王德壽謂仁傑曰尙書必得減死德壽意欲求少階級憑尙書奉楊執柔可乎仁傑曰若何牽之德壽曰尙書爲春官時執柔任其司員外引之可也仁傑曰皇天后土遣仁傑行此事以頭觸柱流血被面德壽懼而謝焉旣承反所司但待日行刑不復嚴備仁傑求守者得筆硯拆被頭帛書冤置綿衣中謂德壽曰時方熱請付家人去其綿德壽不之察仁傑子光遠得書持以告變則天召見覽之而問俊臣曰仁傑不免冠帶寢處甚安何由伏罪則天使人視之俊臣遽命仁傑巾帶而見使者乃令德壽代仁傑作謝死表附使者進之則天召仁傑謂曰承反何也對曰向若不承反已死於鞭笞矣何爲作謝死表曰臣無此表示之乃知代署也故得免死貶彭澤令武承嗣屢奏請誅之則天曰朕好生惡殺志在恤刑渙汗已行不可更返萬歲通天年契丹寇陷冀州河北震動徵仁傑爲魏州刺史前刺史獨孤思莊懼賊至盡驅百姓入城繕修守具仁傑旣至悉放歸農畝謂曰賊猶在遠何必如是萬一賊來吾自當之必不關百姓也賊聞之自退百姓咸歌誦之相與立碑以紀恩惠俄轉幽州都督神功元年入爲鸞臺侍郎同鳳閣鸞臺平章事加銀青光祿大夫兼納言仁傑以百姓西戍疎勒等四鎮極爲凋弊乃

上疏曰臣聞天生四夷皆在先王封疆之外故東拒滄海西隔流沙北橫大漠南阻五嶺此天所以限夷狄而隔中外也自典籍所紀聲教所及三代不能至者國家盡兼之矣此則今日之四境已逾於夏殷者也詩人矜薄伐於太原美化行於江漢則是前代之遠裔而國家之城中至前漢時匈奴無歲不陷邊殺掠吏人後漢則西羌侵軼漢中東寇三輔入河東上黨幾至洛陽由此言之則陛下今日之土宇過於漢朝遠矣若其用武荒外邀功絕域竭府庫之實以爭礪礪不毛之地得其人不足以增賦獲其土不可以耕織苟求冠帶遠夷之稱不務固本安人之術此秦皇漢武之所行非五帝三皇之事業也若使越荒外以爲限竭資財以騁欲非但不愛人力亦所以失天心也昔始皇窮兵極武以求廣地男子不得耕於野女子不得蠶於室長城之下死者如亂麻於是天下潰叛漢武追高文之宿憤藉四帝之儲實於是定朝鮮討西域平南越擊匈奴府庫空虛盜賊蜂起百姓嫁妻賣子流離於道路者萬計末年覺悟息兵罷役封丞相爲富民侯故能爲天所祐也昔人有言與覆車同軌者未嘗安此言雖小可以喻大近者國家頻歲出師所費滋廣西戍四鎮東戍安東調發日加百姓虛弊開守西域事等石田費用不支有損無益轉輸靡絕杼軸殆空越磧踰海分兵防守行役既久怨曠亦多昔詩人云王事靡盬不能藝稷黍豈不懷歸畏此罪罟念彼蒸人涕零如雨此則前代怨思之辭也上不是恤則政不行而邪氣作邪氣作則蟲螟生

而水旱起若此雖禱祀百神不能調陰陽矣方今關東饑饉蜀漢逃亡江淮以南徵求不息人不復業則相率爲盜本根一搖憂患不淺其所以然者皆爲遠戍方外以竭中國爭蠻貊不毛之地乖子養蒼生之道也昔漢元納賈捐之之謀而罷珠崖郡宣帝用魏相之策而弃車師之田豈不欲慕尙虛名蓋憚勞人力也近貞觀年中尅平九姓冊李思摩爲可汗使統諸部者蓋以夷狄叛則伐之降則撫之得推亡固存之義無遠戍勞人之役此則近日之令典經邊之故事竊見阿史那斛瑟羅陰山貴種代雄沙漠若委之四鎮使統諸蕃封爲可汗遣禦寇患則國家有繼絕之美荒外無轉輸之役如臣所見請捐四鎮以肥中國罷安東以實遼西省軍費於遠方并甲兵於塞上則恒代之鎮重而邊州之備實矣況綏撫夷狄蓋防其越逸無侵侮之患則可矣何必窮其窟穴與螻蟻計校長短哉且王者外寧必有內憂蓋爲不勤修政故也伏惟陛下弃之度外無以絕域未平爲念但當勅邊兵謹守備蓄銳以待敵待其自至然後擊之此李牧所以制匈奴也當今所要者莫若令邊城警守遠備斥候聚軍實蓄威武以逸待勞則戰士力倍以主禦客則我得其便堅壁清野則寇無所得自然賊深入必有顛隲之慮淺入必無虜獲之益如此數年可使二虜不擊而服矣仁傑又請廢安東復高氏爲君長停江南之轉輸慰河北之勞弊數年之後可以安人富國事雖不行識者是之尋檢校納言兼右肅政臺御史大夫聖祿初突厥侵掠趙定等州命仁傑

爲河北道元帥以便宜從事突厥盡殺所掠男女萬餘人從五迴道而去仁傑據兵十萬追之不及便制
仁傑河北道安撫大使時河朔人庶多爲突厥逼脅賊退後懼誅又多逃匿仁傑上疏曰臣聞朝廷議者
以爲契丹作梗始明人之逆順或因迫脅或有願從或受僞官或爲招慰或兼外賊或是土人跡雖不同
心則無別誠以山東雄猛由來重氣一顧之勢至死不回近緣軍機調發傷重家道悉破或至逃亡剔屋
賣田人不爲售內顧生計四壁皆空重以官典侵漁因事而起取其髓腦曾無心媿修築城池繕造兵甲
州縣役使十倍軍機官司不矜期之必取枷杖之下痛切肌膚事迫情危不循禮義愁苦之地不樂其生
有利則歸且圖賒死此乃君子之愧辱小人之常行人猶水也壅之則爲泉疏之則爲川通塞隨流豈有
常性昔董卓之亂神器播遷及卓被誅部曲無赦事窮變起毒害生人京室丘墟化爲禾黍此由恩不普
治失在機先臣一讀此書未嘗不廢卷歎息今以負罪之伍必不在家露宿草行潛竄山澤赦之則出不
赦則狂山東羣盜緣茲聚結臣以邊塵暫起不足爲憂中土不安以此爲事臣聞持大國者不可以小道
理事廣者不可以細分人主恢弘不拘常法罪之則衆情恐懼恕之則反側自安伏願曲赦河北諸州一
無所問自然人神道暢率土歡心諸軍凱旋得無侵擾制從之軍還授內史聖歷三年則天幸三陽宮王
公百寮咸經侍從唯仁傑特賜宅一區當時恩寵無比是歲六月左玉鈐衛大將軍李楷固右武威衛將

軍略務整計契丹餘衆擒之獻俘於含樞殿則天大悅特賜楷固姓武氏楷固務整並契丹李盡忠之別
帥也初盡忠之作亂楷固等屢率兵以陷官軍後兵敗來降有司斷以極法仁傑議以爲楷固等並有曉
將之才若恕其死必能感恩効節又奏請授其官爵委以專征制並從之及楷固等凱旋則天召仁傑預
宴因舉觴親勸歸賞於仁傑授楷固左玉鈐衛大將軍賜爵燕國公則天又將造大像用功數百萬令天
下僧尼每人出一錢以助成之仁傑上疏諫曰臣聞爲政之本必先人事陛下矜羣生迷謬溺喪無歸
欲令像教兼行觀相生善非爲塔廟必欲崇奢豈令僧尼皆須檀施得棧尙捨而況其餘今之伽藍制過
宮闕窮奢極壯畫纈盡工寶珠殫於綴飾瓌材竭於輪奐工不使鬼止在役人物不天來終須地出不損
百姓將何以求生之有時用之無度編戶所奉常若不充痛切肌膚不辭錘楚遊僧一說矯陳禍福剪髮
解衣仍慙其少亦有離間骨肉事均路人身自納妻謂無彼我皆託佛法誣誤生人里陌動有經坊闔閭
亦立精舍化誘倍急切於官徵法事所須嚴於制勅膏腴美業倍取其多水碾莊園數亦非少逃丁避罪
併集法門無名之僧凡有幾萬都下檢括已得數千且一夫不耕猶受其弊浮食者衆又劫人財臣每思
惟實所悲痛往在江表像法盛興梁武簡文捨施無限及其三淮沸浪五嶺騰煙列剎盈衢無救危亡之
禍緇衣蔽路豈有勤王之師比年已來風塵屢擾水旱不節征役稍繁家業先空瘡痍未復此時興役力

所未堪伏惟聖朝功德無量何必營大像而以勞費爲名雖敕僧錢百兩支一尊容既廣不可露居覆以百層尙憂未徧自餘廊廡不得全無又云不損國財不傷百姓以此事主可謂盡忠臣今思惟兼採衆議咸以爲如來設教以慈悲爲主下濟羣品應是本心豈欲勞人以存虛飾當今有事邊境未寧宜寬征鎮之徭省不急之費設令厠作皆以利趨旣失田時自然弃本今不樹稼來歲必饑役在其中難以取給況無官助義無得成若費官財又盡人力一隅有難將何救之則天乃罷其役是歲九月病卒則天爲之舉哀廢朝三日贈文昌右相諡曰文惠仁傑常以舉賢爲意其所引拔桓彥範敬暉竇懷貞姚崇等至公卿者數十人初則天嘗問仁傑曰朕要一好漢任使有乎仁傑曰陛下作何任使則天曰朕欲待以將相對曰臣料陛下若求文章資歷則今之宰臣李嶠蘇味道亦足爲文吏矣豈非文士齷齪思得奇才用之以成天下之務者乎則天悅曰此朕心也仁傑曰荊州長史張柬之其人雖老真宰相才也且久不遇若用之必盡節於國家矣則天乃召拜洛州司馬他日又求賢仁傑曰臣前言張柬之猶未用也則天曰已遷之矣對曰臣薦之爲相今爲洛州司馬非用之也又遷爲秋官侍郎後竟召爲相柬之果能興復中宗蓋仁傑之推薦也仁傑嘗爲魏州刺史人吏爲立生祠及去職其子景暉爲魏州司功叅軍頗貪暴爲人所惡乃毀仁傑之祠長子光嗣聖厯初爲司府丞則天令宰相各舉尙書郎一人仁傑乃薦光嗣拜地官

員外郎莅事稱職則天喜而謂曰祁奚內舉果得其人開元七年自汴州刺史轉揚州大都督府長史坐
職貶歙州別駕卒初中宗在房陵而吉頊李昭德皆有匡復讜言則天無復辟意唯仁傑每從容奏對無
不以子母恩情爲言則天亦漸省悟竟召還中宗復爲儲貳初中宗自房陵還宮則天置之帳中召仁傑
以廬陵爲言仁傑慷慨數奏言發涕流遽出中宗謂仁傑曰還卿儲君仁傑降階泣賀旣已奏曰太子還
宮人無知者物議安審是非則天以爲然乃復置中宗於龍門具禮迎歸人情感悅仁傑前後匡復奏對
凡數萬言開元中北海太守李邕撰爲梁公別傳備載其辭中宗返正追贈司空睿宗追封梁國公仁傑
族曾孫兼謨兼謨登進士第祖郊父邁仕官皆微兼謨元和末解褐襄陽推官試校書郎言行剛正使府
知名憲宗召爲左拾遺累上書言事歷尙書郎長慶太和中厯鄭州刺史以治行稱入爲給事中開成初
度支左藏庫妄破漬汚繅帛等職罪文宗以事在赦前不理兼謨封遣勅書文宗召而諭之曰嘉卿舉職
然朕已赦其長官典吏亦宜在宥然事或不可卿勿以封勅爲艱遷御史中丞謝日文宗顧謂之曰御史
臺朝廷綱紀臺綱正則朝廷理朝廷正則天下理凡執法者大抵以畏忌顧望爲心職業由茲不舉卿梁
公之後自有家法豈復爲常常之心哉兼謨謝曰朝法或未得中臣固悉心彈奏會江西觀察使吳士矩
違額加給軍士破官錢數十萬計兼謨奏曰觀察使守陛下土地宣陛下詔條臨戎賞軍州有定數而士

矩與奪由己盈縮自專不唯貽弊一方必致諸軍援例請下法司正行朝典士矩坐貶蔡州別駕兼謫尋轉兵部侍郎明年檢校工部尚書太原尹充河東節度使會昌中累歷方鎮卒

王方慶雍州咸陽人也周少司空石泉公襲之曾孫也其先自琅邪南度居於丹陽爲江左冠族襲北徙入關始家咸陽焉祖蕭隋衛尉丞伯父弘讓有美名貞觀中爲中書舍人父弘直爲漢王元昌友收獵無度乃上書切諫其略曰夫宗子維城之託者所以固邦家之業也大王功無任城戰剋之効行無河間樂善之譽爵高五等邑富千室當思答極施之洪慈保無疆之永祚其爲計者在乎修德冠屨詩禮收獵史傳覽古人成敗之所由鑒既往存亡之異跡覆前戒後居安慮危奈何列騎齊驅交橫壘敵野有遊客巷無居人貽衆庶之憂違一情之樂從禽不息寔用寒心元昌覽書而遽止漸見疎斥轉荆王友龍朔中卒方慶年十六起家越王府參軍嘗就記室任希古受史記漢書希古遷爲太子舍人方慶隨之卒業永淳中累遷太僕少卿則天臨朝拜廣州都督廣州地際南海每歲有岷崙乘舶以珍物與中國交市舊都督路元睿冒求其貨崙崙懷刃殺之方慶在任數載秋毫不犯又管内諸州首領舊多貪縱百姓有詣府稱寃者府官以先受首領參餉未嘗鞫問方慶乃集止府寮絕其交往首領縱暴者悉繩之由是境內清肅當時議者以爲有唐以來治廣州者無出方慶之右有制襲之曰朕以卿歷職著稱故授此官旣美化遠

聞實副朝寄令賜卿雜綵六十段并瑞錦等物以彰善政也證聖元年召拜洛州長史尋加銀青光祿大夫封石泉縣男萬歲登封元年轉并州長史封琅邪縣男未行遷鸞臺侍郎同鳳閣鸞臺平章事俄轉鳳閣侍郎依舊知政事神功元年七月清邊道大總管建安王攸宜破契丹凱還欲以是月詣闕獻俘內史王及善以爲將軍入城例有軍樂既今上孝明高皇帝忌月請備而不奏方慶奏曰臣按禮經但有忌日而無忌月晉穆帝納后用九月九日是康帝忌月于時持疑不定下太常禮官荀詡議稱禮祇有忌日無忌月若有忌月卽有忌時忌歲益無理據當時從詡所議軍樂是軍容與常不等臣謂振作於事無嫌則天從之則天嘗幸萬安山玉泉寺以山徑危懸欲御腰輿而上方慶諫曰昔漢元帝嘗祭廟出便門御樓船光祿勳張猛奏曰乘船危就橋安元帝乃從橋卽前代舊事今山徑危險石路曲狹上瞻駭目下視寒心比於樓船安危不等陛下蒸人父母奈何踐此畏塗伏望停輿駐蹕則天納其言而止是歲改封石泉子時有制每月一日於明堂行告朔之禮司禮博士辟閭仁壽奏議其略曰經史正文無天子每月告朔之事唯禮記玉藻云天子聽朔於南門之外其每月告朔者諸侯之禮也臣謹按禮論及三禮義宗江都集禮貞觀禮顯慶禮及祠令無天子每月告朔之事若以爲無明堂故無告朔之禮有明堂卽合告朔則周秦有明堂而無天子每月告朔之事臣等參求既無其禮不可習非以天子之尊而用諸侯之禮方慶

又奏議其略曰明堂天子布政之宮也謹按穀梁傳云閏者附月之餘日天子不以告朔非禮也閏以正時時以作事事以厚生生人之道於是乎在矣不告閏朔棄時政也臣據此文則天子閏月亦告朔矣豈有他月而廢其禮乎先儒舊說天子行事一年十八度入明堂矣大亨不問卜一入也每月告朔十二入也四時迎氣四入也巡狩之年一入也今禮官議唯歲首一入耳與先儒既異在臣不敢同宋朝何承天纂集其文以爲禮論雖加編次事則闕如梁代崔靈恩撰三禮義宗但摭摭前儒因循故事而已隋煬帝命學士撰江都集禮祇抄撮舊禮更無異文貞觀顯慶禮及祠令不言告朔者蓋爲歷代不傳所以其文乃闕各有緣由不足依據今禮官引爲明證在臣誠實有疑則天又令春官廣集衆儒取方慶仁壽所奏議以定得失時成均博士吳揚善太學博士郭山惲等奏按周禮及三傳皆有天子告朔之禮秦滅詩書由是告朔禮廢望依方慶議有制從之則天以方慶家多書籍嘗訪求右軍遺跡方慶奏曰臣十代從伯祖羲之書先有四十餘紙貞觀十二年太宗購求先臣並已進之唯有一卷見今在又進臣十一代祖導十代祖洽九代祖珣八代祖曇首七代祖僧綽六代祖仲寶五代祖寯高祖規曾祖襄并九代三從伯祖晉中書令獻之已下二十八人書共十卷則天御武成殿示羣臣仍令中書舍人崔融爲寶章集以敘其事復賜方慶當時甚以爲榮方慶又舉令杖舄喪大功未葬不預朝賀未終喪不預宴會比來朝官不遵

禮法身有哀容陪預朝會手舞足蹈公違憲章名教既虧實玷皇化伏望申明令式更禁斷從之方慶漸以老疾乞從閑逸乃授麟臺監修國史及中宗立爲東宮方慶兼檢校太子左庶子聖歷二年壹日則天欲季冬講武有司稽緩延入孟春方慶上疏曰謹按禮記月令孟冬之月天子命將帥講武習射御角力此乃三時務農一時講武以習射御角校才力蓋王者常事安不忘危之道也孟春之月不可以稱兵兵者甲冑干戈之摠名兵金性尅木春盛德在木而舉金以害盛德逆生氣孟春行冬令則水潦爲敗雪霜大擊首種不入蔡邕月令章句云太陰新休少陽尙微而行冬令以導水氣故水潦至而敗生物也雪霜大擊折陽者也太陰干時雨雪而霜故大傷首種首種謂宿麥也麥以秋種故謂之首種入收也春爲沍寒所傷故至夏麥不成長也今孟春講武是行冬令以陰政犯陽氣害發生之德臣恐水潦敗物霜雪損稼夏麥不登無所收入也伏望天恩不違時令至孟冬教習以順天道手制答曰比爲久屬太平多歷年載人皆廢戰並悉學文今者用整兵威故令教習卿以春行冬令則水潦爲敗舉金傷木則便害發生循覽所陳深合典禮若違此請乃月令虛行仁敗直言用依來表是歲正授太子左庶子封石泉公餘並如故俸料同職事三品兼侍皇太子讀書方慶又上言謹按史籍所載人臣與人主言及上表未有稱皇太子名者當爲太子皇儲其名尊重不敢指斥所以不言晉尙書僕射山濤啟事稱皇太子而不言名濤中

朝名士必詳典故其不稱名應有憑准朝官尙猶如此宮臣歸則不疑今東宮殿及門名皆有觸犯臨事
諭啟迴避甚難孝敬皇帝爲太子時改弘教門爲崇教門沛王爲皇太子改崇賢館爲崇文館皆避名諱
以遵典禮此卽成例足爲軌模伏望天恩因循舊式付司改換制從之長安二年五月卒贈兗州都督諡
曰貞中宗卽位以宮寢之舊追贈吏部尙書方慶博學好著述所撰雜書凡二百餘卷尤精三禮好事者
多詢訪之每所酬答咸有典據故時人編次名曰禮雜答問聚書甚多不減祕閣至於圖書亦多異本諸
子莫能守其業卒後尋亦散亡長子光輔開元中官至潞州刺史少子駿工書知名尤善琴碁而性多嚴
整官至殿中侍御史

姚璿字令璋散騎常侍思廉之孫也少孤撫弟妹以友愛稱博涉經史有才辯永徽中明經擢第累補太
子宮門郎與司議郎孟利貞等奉令撰瑤山玉彩書書成遷秘書郎調露中累遷至中書舍人封吳興縣
男則天臨朝遷夏官侍郎坐從父弟敬節同徐敬業之亂貶桂州都督府長史時則天雅好符瑞璿至嶺
南訪諸山川草樹其名號有武字者皆以爲上應國姓列奏其事則天大悅召拜天官侍郎尋於選補時
人稱之長壽二年遷文昌左丞同鳳閣鸞臺平章事自永徽以後左右史雖得對仗承旨仗下後謀議皆
不預聞璿以爲帝王謨訓不可暫無紀述若不宣自宰相史官無從得書乃表請仗下所言軍國政要宰